



T 3210/8546.81

20





CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

錢塘縣志卷之二十四

吳興縣志卷之二十四

人物義行

錢塘縣知縣南樂魏順纂

哈佛大學漢和
圖書館藏印

錢塘縣志

周禮六行任卹等於睦嫻此義行之仿矣其類甚多
然求如古人之卓卓可紀者少間有一二急人之難
卹人之貧而好行其德者可不表章而稱述之歟錢
塘四方之民萃居雜處其感於時會激於義理者所
在多有亦足以化薄俗而砥頽風矣志義行

六宋
朝

范叔孫 性仁厚里中疾疫躬持粥藥恤療之有父子兄弟同死者數家尸經旬莫收叔孫悉備棺槨殯瘞人呼范義孝建初辟竟陵王中軍不就

梁

范元琰 字伯珪祖悅之為太學博士朝廷辟召不赴父靈瑜居父憂以毀卒元琰時童孺哀慕盡禮及長好學博通經史性謙讓不以所長驕人祖母患癰嘗自含吮與人言嘗恐傷物居家不出城市雖獨居如對嚴賓見者莫不改容正色家貧惟以園蔬為業嘗出行見人盜其菘元琰遽退母問竊者為誰答曰向所以退畏其愧恥今言其名願不洩也或有涉溝盜其符者元琰因伐木為橋以渡之自是盜者大慚一郡無復草竊齊建武二年召為安北參軍不赴沛國劉獻深加器異嘗表稱之梁天監九年縣令管慧辨上言義行揚州刺史臨川王宏辟召辭不至十年王拜表薦未召卒

五代梁

褚雅 字元道梁末隱居於茅山重施輕財拯物無厭營田既獲以予貧者與人共居常旦起灑掃取水徧以周給覓薪之人夏日種瓜恣人來取當時行暑道無暍者人或以為難而元道行之終身如一日也

宋

葉杲卿 名曙避英宗諱以字行生而穎拔凡三試開封率高等嘗試御前恩授鄭州長史司法桂州卒贈太子中允杲卿在桂有吳謚為象州武化令而死其妻挈二女歸閩而妻又死杲卿為置地合窆之哀其二女之無歸也娶以為二子婦家故饒財諸弟用之殆盡乃求異籍杲卿喟然曰家至此由吾祿薄不足以及聚親族汝曹何咎弟聞而慙沮復合如初師事林逋天禧末錢塘有巨石浮江太守問逋逋以問杲卿杲卿乃按樵子五行志以應曰其當在萬乘乎未幾真宗上仙於是人服杲卿多聞而始知樵子為奇

書二子昌言昌齡同年進士第昌言秘書
丞昌齡屯田員外郎皆以學行政術知名

元

夏應祥

元置行諸路金玉總管府於杭治百工之事祥
用薦為其府大使陞軍器局提舉舉尋移
疾去為人端重詳慎處鄉黨謙抑自持不嗜
嘗以口腹傷物命素習岐黃氏書多市珍藥分
者錢塘地大物眾凡需藥劑者必集夏氏之門
年七十二卒

明

柴望

字宗禮性樸茂喜行義事有友金觀括蒼人隨父
宦遊錢塘因家焉後舉進士為學官貧不能葬母
望經紀其喪觀竟以哀毀成疾卒妻亦相繼歿望哭
曰吾友不幸至是且其子弱三喪在前吾責也乃捐
家貲為治喪
事人稱其義

章一桂

字孟芳少為諸生有文名家故饒於貲而弟一
愧不事生產母又愛憐之蕩費都盡一桂蕭然
自若曾無幾微之色拂慈母心嘗出野拾遺金立待
至暮有倉皇慟哭來者問之曰某逋欠官糧不得已
鬻女以償頃且遺却休矣吾將往沉於河一桂乃出
諸袖而還其人叩問姓名不答初假館鄰園主人老
無子遣妾夜奔一桂正色拒之後竟裹足不往臨歿
時執孤士斐手曰吾不幸早世然累世忠厚後必有
與者汝善承之吾目且瞑矣卒年三十八繼室高苦
節五十四年子士斐纔十歲零丁孤露竟成大儒

徐江山

中正德辛巳科進士官尚寶卿工真草世宗愛
其書凡御製詩文必命書以進詳悉方技性尤
耿直敢言夏言與會銑受禍無敢白其冤者江山首
上疏申救陶仲文段朝用以方術得幸江山立辨其
奸雖數觸上怒然心知其不阿勿為罪又馮恩繫獄
中子行可刺血寫疏自縛闕下江山力贊通政為引
奏得末減其激
於義理如此

錢科 郡明經家世素封敦行尚義嘉靖間連歲浣饑當

事設法勸賑入粟五十石者附學入監時科已出

貢捐賑獨多不下百倍巡按舒汀提學孔天引特請

照景泰例已剗帶者陞其級授正六品職不支俸科

又自設粥廠拯濟里民所居近渡船埠後架木橋徑

曲險濘多溺者科特闢所居屋直衢達河且斲石為

大橋行者德之稱為南橋以別橫河東西二橋科

後遂以南橋為號更名其橋曰萬安至今利焉

歸漢 字源之富而好義前仁錢兩邑額辦馬價計每丁

出銀二錢有奇貧氓困甚漢陳牒臺司請均之各

邑奔走經營罔恤勞費嘉靖癸巳郡守姜志德遂議

丁祇徵銀一分七釐九邑通共無贏縮民省重賦皆

漢德也

徐季韶 字鹿園天性孝友平生陰行善事戊辰海嘯漂

沒數十萬家隔江浮棺以數百計韶斥肥田數

十畝瘞埋之辛巳歲大稔沿塘設粥廠十五所日費

米三十斛新穀升始罷又開藥局救瘟疫存活不可

記數遠近
至今德之

陳昱 西壁人以兩邑僉報總甲之役擾民陳牒分巡康

朗康下之邑時邑令程良龔雲從議覈戶貧富定

為上中下法多寡徵銀

僱募充役胥稱便焉

丁仕卿 上虞人寓杭為東里坊之社教讀見會城之民

憊於夫役亦投牒當路謂官夫百七十名足備

撥遣夜巡之役既戶出間架錢以召募總甲火夫而

復差及保甲俾民財力兩敝請俱罷免事下諸司議

徵巡員役以不便其私許仕卿撓亂成法聽者不察

嚴行桎梏回越仕卿必遂夙志萬曆二年仍來杭陳

請再下二邑議咸是之自是前兩役悉就捐除仕卿

沈希渭 杭城獨有間架銀每地一畝作二十間又科稅

一錢零民困不堪希渭呈請依地起科缺額銀

派通縣督撫張佳引
奏聞報可民省重賦

傅昇

號竹亭由歲薦仕益府典寶司素長者與淮海馬
試善試任天台攜妾與俱不為嫡所容謂昇曰有
妾當遣念其性頗柔慧不欲歸俗子請以贈公昇辭
之再三不得時昇姐以瞽故不字人囑與同寢處者
三年未嘗謀面後試妻死昇告以故使重合遂舉三
子胡給諫初麟以言事謫其子貯千金其家去而溺
於湖已數年矣後給諫過訪昇出所貯還之封識宛
然有台人以株累得罪者發城旦稔知昇長者遺囊
金寄之事急不告姓名去達罪所即物故昇無可還
以其金力行善事濟人向寺觀中書其事題曰武陵
驛徒遺助云應中
丞有却妾還金傳

吳憲

性謹厚而喜義舉初徽商子弟不得與試杭州憲
力請於巡鹽上疏報可乃立商籍得入泮於府仁
錢三學如民籍之數子四人
肫摯誠樸俱壽至九十餘

吳元良

字子庄弱冠補邑博士弟子員性豪邁樂施以
節俠自喜善詩文工書法不耐治生客至顧囊
有一錢亦留飲父歿遺券數十紙計貲數千餘緡元
良悉召其人授之多有固却者元良勉之曰無庸俟
若盈時割餘以佐我酒貲不後也皆感謝去有不知
其家者持造市中焚之語市人曰願傳語鄉閭有負
杭吳長公債者吾已焚券無煩歸直也時華亭徐相
公階督學兩浙獨高元良奇士厚禮之既去時時寄
書問吳長公無恙否而元良裁謝外
一不涉干請亦未嘗以此矜於人

國朝

關大生

字玉門九歲而孤事母霍孝家中落遂棄去舉
子業不階尺寸累致千金性任俠旋積旋散親
黨多賴以舉火里中貧兒負急債欲售其妻輒代償
使復完聚有患瞽者力不能治已去為丐延至家療
之目復明寒冬大雪親煮粥分給全活饑者無算姻
戚賢者歲時遺贈不絕居常手書誠子謂功名科第
亦學人分內事但須楷模聖賢立身忠孝為可傳可
法之人斯足重耳大生卒元配王稱未亡人者四十

年婚嫁子女具有禮法子鍵成進士即謝病還家三十年堅卧不出

陳幼學

邑庠生崇禎壬午歲貢謁選得徽州績溪知縣國朝丙戌又署順昌教諭值海寇侵順昌幼

學嬰城拒守以無援城陷後援師始至時民人離竄我師目為土寇將殲之幼學力請主將曰此順昌赤子也幸勿加害遂下令勿殺得保全者無數父堯謨事親最孝嘗拾遺金於道守而還之遇女子於途知其迷失訪其家歸之

章華

字素先邑諸生嘗割股療親分資以給兄弟子尤慨慷尚義國初大兵臨會城顧令咸建死之人

莫有殮者華同郡諸生許昭遠毅請其首捐貲禮殯後其子來奔喪復贈賻衣縞素送之郊外又嘗倡贖難婦設義塾士林多之

許孝恭

名昭遠明侍御史三省曾孫以清白吏子孫操行高邁喜讀書尚氣節皇朝定鼎之初錢塘

冷顧諱咸建以節死懸其首於鎮海樓下昭遠惜其清正愛民獨為力請於貝勒王許其殮而歸之士大夫咸高其義昭遠事親孝母郭氏疾甚晝夜籲天因割股和藥以進疾稍痊復病竟不起昭遠哭泣哀號遂喪其明妻盧氏尤善事舅姑里人咸稱之

沈穆

字旦及自吳興徙錢塘穆為人深沉有經世畧早為高才生屢踏省門不見收一就漳平司訓遂棄

去穆素受業於吳太冲太冲為他事牽連騎者至門逮其弟太淳穆慨然曰吾師坦中無他腸奈何波及其弟乃匿淳他所而自假淳名質對即得白已乃遊燕薊楚豫閩粵諸大吏皆以聘迎之性慷慨周人之急不啻如已事嘗棄數千金不顧子五人仲子自圻已酉舉人

吳璠

字子璠父憲疾革璠割股進後母喪泣血三年目為失明性尤好義康熙甲寅值閩變隣郡子女多

被俘掠璠傾家請贖完其父子夫婦者幾千人又杭城四方雜處多流亡無殯者璠創悲智社釀金以殮

歲率為常臺使者歷旌其門年九十三以壽終

汪士媚 字仲脩邑諸生康熙甲寅耿逆之變獻平閩八

恢復永康縉雲被掠子女悲聲載道媚具啟於王情詞懇切王允其請悉遣歸是年九月王偕往閩為逆黨曾養性所執罵賊死義聲大振先是媚兄士巖令海澄浦課巡按具題禍且不測媚挺身代償當事者嘉其義釋之四十二年巡撫張泰交准請崇祀鄉賢

裘傲誠 號靜止事親從兄孝友兼至母歿結素幔於柩側寢處三年題曰永思廬伯兄早逝撫其遺孤

至成立人有急難到門即素不相識竭力援拯積逋數萬緡即焚券不責報尤厚恤親族凡鰥寡困乏者歲計所需給之其他行藥治病掩骼埋齒垂四十年無稍倦晚年留心養生家言年至大耋兒齒復生以長子充美貴封御史崇祀鄉賢

錢士璉 字奇玉郡諸生嘗遊學東甌值山寇竊發海氛未靖璉佐掾幕出奇計定之浙東諸郡賴以安

堵又嘗勸禁俘掠出株連人德其義當事欲疏薦不受黃剋野服日徜徉湖山間年八十七壽終以子驊累贈驃騎將軍孫彥達成進士

吳炳 字睿思四歲母病不食炳號啼亦不食家人百計誘之卒不食及母病稍瘥進一食炳始跳躍牀蓐

間弄母乳且悲且喜一時競傳為異及長負至性家遭誣炳奮身庭辨蕭中丞躋之遂得解又嘗上范中丞七郡水利書萬餘言及代償膠民張佛鬻妻金皆義舉也子觀域中康熙己丑進士

吳維烈 字期安六歲而孤家貧事節母汪克盡孝道以率勤起家雖稍致豐厚不忘儒素一以淳樸訓

其子孫尤樂善見義勇為河陽趙公撫浙開城河以利商民維烈急公首捐數百金協助又捐建橋梁以便行旅他若周郵嫗族給人婚喪尤指不勝屈邑令重其賢嘗禮延賓飲年七十壽終子三人以長子琮

刑部員外封如其官次子琛字彥瑜少負雋才七試棘闈不就遂淡於進取生平慷慨遇人緩急不靳傾囊歲饑輒輸粟拯濟又廣設粥廠一時多賴其全活尤知人樂成就寒畯如沈進士某者皆未第時所獎識也晚年陶情觴咏著有瑤圃詩草子七人長元鈺宰潛江初封文林郎次元錦復佐郡河南晉奉政大夫

凌克閻

字步騫七歲喪父痛母荼苦奮志服勞以博色養會兵燹遇有孤嫠失所者厚卹之後罹隣火室廬蕩燼猶日拯卹同灾年六十嘗白為壽詞有曰澹泊素秉勿耽歌舞食取其飫何必魴鱖衣取其適何必楚楚恤其匱乏胡分爾汝資其嫁娶曰予是主拂逆之來理以自矩蓋實錄也子紹乾中已卯副榜

葉日章

字子山邑諸生善屬文家貧日無宿儲敗絮自擁或委以事然諾不侵不名一錢有趙友令延津章與俱為課其子俄趙以暴疾卒子尚幼章為視飯含兼營護後事區畫其任內未完及錢穀出入盈

縮悉井井無欺上官重其義為遣吏衛趙喪歸章仍教其子成長始告去章死時無子有五女章皆擇嫁能文士有汪楷者中戊子鄉試

陳潢

字天一少任俠抱經濟才文襄靳公總督河工知潢可大用委以河務凡河隄衝決及興築方畧俱有成算疾風猛雨之時潢獨駕輕舸深冒不測水之淺深時之盈涸瞭然若指掌時方開運河以濟漕艘潢為建閘築堤刻期而成疏聞

特授河道文襄將欲舉以自代會潢卒乃已其所著治河策深悉機宜惜乎不傳潢喜與名士交性慷慨一言投契揮手千金勿吝至今受恩者語及潢每為流涕

胡法遠

字士宏性樂善嘗施粥賑囚康熙八年間與朱錫九倡請督撫劉范二公暨各紳士捐金置田四百畝合前錢嚴二紳施田共五百畝名曰監田歲入田租除正供外日施擔粥於司府縣監煮粥於甘泉菴舉僧董役而遠等每歲彙冊申核三年則檄報換僧又力贊劉總制檄虎林書院傍租三十九兩零

充奏條糧後復奉張巡撫批准存案至今遠子榮九孫本繼志司事奉行勿替

姚殿岳 字鎮公明季世有軍職後復徵授不就隱居教授年及三十始娶生一子旋喪其偶遂誓不娶

陸堦嘗贈以詩曰知君失偶在強年守義何曾再續絃淡淡胸懷爭似水稜稜風骨宛如仙邑乘有光應致美世風增重競稱賢芳規留待輜軒採佇看恩褒出九天

俞世贊 河南僉事森之父也為人孝友慷慨重信義繼父常被酒墮水贊投身急流中拯之出又嘗捐

金以濟遠商撫孤以恤好友

丘文煜 字元矩年十四食餼積三十四載充康熙丁丑恩貢生平有功學校歲已酉全教諭鄒鑽特捐

建大成殿後又請於巡撫趙士麟復捐建明倫堂嘗路拾重貲還人及表姑貞節義行甚夥事父應昌備極孝養父八旬目忽雙瞽文煜朝夕籲天得神醫復明有還睛錄傳世

鮑彩 字素庵天性慕義年甫二十七喪耦矢志不娶教子成立壽逾耆艾獨居鰥室家雖壁立樂善好施

朱恒孚 字子鶴年十四刲左臂以療父疾明季歲歉嘗至老嘗推宅讓兄又嘗仿蘇氏族譜范氏祭田立省墓法儀文器具纖悉必周顧侍御豹文特為文以表

其事

汪燦 字且質其先新安人從祖徙錢塘遂為錢塘人為人慷慨好義言信行果已諾必誠有季心劇孟之

風與戶部侍郎嚴沆御史顧豹文為布衣之友多遊公卿大夫間所至人爭重之課其子曾垣讀書必延名師常以厚幣重贄聘章士斐士斐雅不欲往託以先受人舍館矣燦致敬盡禮不少衰凡二年士斐始

就主賓師弟間驩相得也其從弟某好博博輒負而不能償今書兄券為弟代償矣燦信之不疑又數年從弟出亡旗人乃率其黨若干人拔刀直入燦室欲

據其屋燦始驚顧度不能爭遂舍之會巡撫趙士麟下車廉得其情令於軍門曰本院親訪得旗廝周某白占汪燦屋一所值萬金本人畏懼不敢控告於是燦始具詞旗人猶執券爭之賴中丞得白然燦終以從弟之故割其半予之而弗責也燦家竟中落子會垣三仕為知縣所至皆有聲去後人多思之以卓異薦授山西絳州知州今為四川真安州知州云

徐陸

字文安邑諸生博學有至行精於數術力行善事尤急人患難汪太上感應諸書刊行之子天任字大士杭郡諸生善屬文每試必冠軍為學使者所賞識食餼於庠性醇謹與人交有終始一時賢士大夫皆稱為東南人士冠冕

方擢

字書升少孤事母田及祖母余克盡孝養性嗜書工文章詩宗王孟古文在昌黎廬陵之間弱冠即有聲庠序既而貢入成均四方學士大夫聞擢名爭相結納而擢頗以經濟自負不屑屑於章句初先世

嘗業鹽故擢於蠶政利弊洞悉毫末康熙三十八年春翠華南幸擢率眾具疏請蠲加增鹽課六萬三千有奇

上召擢前溫問良久竟可其奏其他抱負種種未竟其用遽以疾卒

王耀

字玉章幼善屬文讀書攻苦歲時不輟年十四為錢塘諸生蜚聲黌序屢困場屋遂嘆曰功名固有命耶立身當以德為本也其事父行可極孝過庭之訓嚴以肅耀能愉婉受之行可好善樂施與耀必承其志而廣之迨父卒哀瘁盡禮以終其喪處兄弟間怡怡敬愛生五子兄卒無後以長子為其後教諸子以義方各授之業且以讀書為善為祖訓汝曹當勉之康熙年

詔求賢良於山林隱逸間紳士欲以耀舉之中丞某公已繕詞耀覺遍謝諸紳士曰耀方將致衣頂優游泉石以終餘年諸公何窘我為性好讀史雖大寒暑未嘗釋卷年七十日昏不能視必令子若孫一人侍側凡

所欲觀即令誦讀之至適意處仍擊節嘆艷之其待族戚黨親無不溫厚和睦貧難者必周給之雖數至終無吝色人以長者稱之壽七十八微疾善逝鄉里咸以為厚德之効云

何翰

字西園太學生生而穎悟過人童時即不屑與群兒伍長通經史入太學以父母春秋高諸弟妹幼

家故貧不得已棄舉子業以刑名參謀宰輔當代名公卿爭禮聘焉性至孝尤篤友愛有妹早寡膳之撫其孤以成人終身畧無倦意每遇人急難事必竭力以濟一日途遇故人章某遭訟事攜女以鬻翰力勸止即助之金且曰如不足再當勉勸幸毋為所輒又有友陸某者屆嚴冬父子將以饑寒斃翰聞之即解衣以衣旋歸以告其家人更脫簪典飾給濟彌月俱得以生蓋兩姓至今皆成聚族云年六十四卒卒之日遠近聞者涕零子宗顯

宗顯並能文有學藝苑

吳瑣

字睡庵為人淳謹事親孝生則承歡歿則朔望必往省墓風雨寒暑不輟數十年如一日也事兄友

愛白首無間言祖墓為人爭訟費五六千金不少吝惜嘗有某負千餘金貧不能償疾革時延瑣入室伏枕叩頭曰吾負若目且不瞑矣瑣慨然曰是何言哉遂出券焚之且厚贈棺殮之費其慷慨周急類此教子以義方為州牧仁慈愛民悉本之庭訓焉

許頤齡

字友期太學生唐遠公後裔也幼而好學善屬文而數奇不偶又早失怙不得已遵母命投筆

為計然之策以供菽水歡母壽考終哀毀骨立戚黨咸稱死孝焉長兄早歿撫姪如已子教養婚娶為人所難能嘗遇異人曰爾克盡人道尤當廣行善事授以秘方種種頤不惜重費製丹膏濟眾罔不速效平生喜交遊好藏書士大夫聞其風者爭結槃敦戶外屢常滿舉子六年五十四而終遠近來弔者莫不流涕

論曰義之為用大矣有舍生之義有慷慨之義有廉

讓之義有施濟之義夫同秉陰陽以生戴乾履坤義之所動豈知性命雖湯鑊斧鉞有蹈之而不悔者蓋有公卿大夫所不能爲敦詩說禮之士所不敢言而草野匹夫毅然赴之者其所性然也若夫廉讓推財可以化強暴好施周急可以勵風俗如必伯夷柳下惠而後能立頑起懦則世無善人矣故余錄義行而不遺一節者亦與人爲善之意也

錢塘縣志卷之二十四

錢塘縣知縣南樂魏源纂

武功

傳云有文事者必有武備顧兼之者鮮矣武功多出於危亂之世亦天挺其人以拯世之憂患者也大則見於衛社稷捍封疆小則見於保城邑護鄉里皆不可沒也錢塘自武肅奮起以來不乏偉人詩曰糾糾武夫公侯干城亦足見化行俗美人材衆多之效也

志武功

漢

韓終古

元封元年冬從樓船將軍楊僕出武林擊東粵斬徇北將軍封禦兒侯

吳景

本吳人徙居是邑早失父母姊與孫堅為婚隨堅征伐拜騎都尉領丹陽太守合孫策兵共討涇縣山賊祖郎為劉繇所迫敗走景北依袁術術以為督軍中郎將與孫賁共討樊能于麋於橫江又擊笮融薛禮於秣陵時策被割牛渚降賊復反景攻討盡擒之策遣景往壽春報術術以景為廣陵太守術僭號又不納策言景委郡東歸策復以景為丹陽太守漢遣議郎王誦命南行表景為揚武將軍領郡如故建安八年卒官其二子奮授兵為將軍新亭侯祺都亭侯

三吳

全琮

字子璜柔之子柔為桂陽太守嘗使琮賫米數千斛到吳市易琮中途給火空船而返柔大怒琮頓

首言曰所市非急而士大夫有倒垂之患故賑贍不及報柔更奇之時中州士人避亂而南依琮者以百數琮傾家給濟與共有無遂顯名遠近後權以為奮威校尉募名得精兵萬餘人出屯牛渚稍遷偏將軍黃武元年魏舟軍大出洞口權使呂範督諸將禦之敵數以輕舟抄擊琮擊破之梟其將尹盧遷琮綏南將軍進封錢塘侯四年假節領九江太守七年丹陽吳會山民為寇攻沒屬縣權分三郡險地為東安郡琮領太守琮時治富春明賞罰招欵附數年中得萬餘人權召琮返牛渚罷東安郡黃龍元年遷衛將軍左護軍徐州牧尚公主嘉禾二年督騎五萬征六安六安民皆散走諸將欲捕之琮曰分兵捕民得失相半縱有所獲猶不足以弱敵如或邂逅虧損非小琮不敢邀功以負國也赤烏九年遷右大司馬左軍師琮身既親重子弟寵貴然謙虛接士貌無驕色十二年卒

陳

杜稜

字雄盛少落魄不為時知頗涉書傳游嶺南事梁廣州刺史蕭暎暎卒從陳武帝平蔡有功梁元帝

承制授石州刺史上陌縣侯侯景平武帝鎮朱方以稜監義興瑯琊二郡齊師渡江攻臺城稜抗拒未嘗

解帶賊平以功除右衛將軍丹陽尹永定元年進侍中中領軍武帝崩文帝在南院時內無嫡嗣外有強

敵稜在都獨典禁兵乃與蔡景歷等秘不發喪奉迎文帝文帝即位遷領軍將軍以預建立功改封永城

縣侯位丹陽尹廢帝即位加特進侍中右光祿大夫稜歷事三帝並見恩寵卒贈開府儀同三司謚曰成

配饗武帝廟庭子安世嗣

五代 吳越

薛溫

有勇力善騎射吳越王弘佐時為都頭統軍使胡進思恃迎立功干預政事弘信惡之與何承訓丘

昭券謀昭券以進思黨盛難制不如容之進思作亂帥新兵戎服入見弘信叱之不退駭愕趨入義和院

進思鎖其門矯稱王命傳位於弘俛而遷弘俛於衣

錦軍弘俛遣溫將親兵衛之潛戒之曰若有非常處分皆非吾意爾以死拒之可也進思請殺廢王弘俛

弘俛不許進思詐以王命令溫害之溫曰僕受命衛王不聞殺王無已必請而後可進思意沮乃夜令二

人挾刀踰垣而入弘俛闔戶大呼溫聞之急率衆入立斃之庭中入告弘俛弘俛大驚曰全吾兄者汝之

力也進思內憂懼疽發背死弘俛由是獲全溫累官睦州刺史卒謚正獻

鮑君福

字慶臣為錢氏相賜田於玉泉寺側今所稱鮑家田是也性淳厚有膽氣從軍以驍果稱初從

劉漢宏繼歸錢鏐累從征伐有功能馬上輪雙劍入陣望之如飛電為衢州應援指揮使屬刺史陳章叛

乃以淮帥命辟為郡職君福力拒不納伺守者醉奔歸尋刺衢州淮將周本守信州屢侵其境貞明四年

君福從錢球攻信州斬其將呂師造擒偏將馮敏等本僅以身免元瓘領節辟為副使尋奏授刺史保順

軍節度使同平章事兼侍中晉天福五年卒年七十七謚忠壯子脩遜

成及

字洪濟咸通中捍山賊逐齊寇聲名遂振乾符間

都將劉漢宏作亂與鏐同討平之北關鎮將劉孟安謀亂即席奮劍將犯鏐及舉胡牀制之偏將盛造因執孟安就戮以功奏遷散騎常侍復為靖江鎮光啓中潤州薛朗叛命及征之夏五月進圍常州克之尋平潤州奏授兵部尚書充本州防禦副使潤州阮結卒命及代之累遷檢校司空尋為蘇州刺史乾寧三年淮人圍蘇常熟鎮將陸郢巡檢郭用等以城應寇城陷及以禮見淮帥楊行密行密閱及府庫私室皆藥物圖書而已由是重之至淮南辟為行軍司馬及拒之曰及以百口托于錢塘不幸城陷于叛以至于此豈宜以本道符竹授富貴于隣境乃引佩刀自刺行密遽止之因厚禮而歸累授鎮海節度副使奏授司徒至太傅天復中鏐遊衣錦軍使武勇都將士治溝洫軍中多怨言及請罷役不聽俄而作亂鏐回

至北郭微服將入城及乃代乘鏐車行與賊鬪鏐遂得入鏐性嚴急每有檢發亟加斬決或及至雖盛怒必為之釋其寵遇如此累奏授保大彰義等軍節度使開府儀同三司檢校太師兼侍中卒年六十七及在開平中嘗避梁室廟諱改姓成今從其本姓

杜建徽

字延光少強勇不與諸昆弟類父稜為常州刺史建徽代為武安都將稜為淮人所逼建徽馳

赴之城已拔被執及稜歸自淮南建徽軍中嚴整無改稜制稜甚稱之稜將沒散家財于諸子惟授建徽一劍曰此吾歷任所秉者獨汝能傳之徐縮叛鏐于杭焚掠城郭建徽自新城以本都之兵馳赴難因命守禦縮等已攻內城聚木將焚北門建徽使以火鈎取其木先焚之木不得聚賊計遂沮或勸鏐渡江保會稽建徽曰事苟不濟同死于此必東渡亦售命于賊耳鏐納之睦州刺史陳詢不受鏐命鏐以建徽與詢姻婭疑之使馬綽伺其意建徽曰陳氏背義自貽覆族建徽既姻婭固應見疑然累書諭之皇天后土

苟或鑒察方明此心俄有睦吏降持建徽所遺詢書至皆勸戒之詞鏐嘉嘆久之兄建思嘗譖其蓄兵仗為異圖鏐使索之建徽方食使者直入臥內建徽食不顧使者以聞鏐感悟益加殊待子孫昆弟朱紫車馬盈門而性儉素導從不過數人財物輒散鄉里親族每從征伐單衣入陣衆皆披靡軍中謂之虎子嘗從鏐弟鏐救姑蘇與敵禦逼河梁斷鞭馬逕渡年高不廢騎射嘗擊毬于廣場與酣有宿中箭鏃自臂中飛出人皆壯之仕吳越歷四王檢校太師左丞相以漢乾祐三年卒年八十八贈太師謚威烈

鮑脩遜

君福子寡言語總軍嚴肅累官上直指使衢州刺史梁開運四年為戍將獲李儒贊于福州儒贊叛脩遜殺之傳首錢塘周顯德三年脩遜從吳程攻常州以應世宗之師至宋建隆元年知福州彰武軍事後為上直諸軍都鈐轄使同叅丞相府事卒

曹圭

圭父信由歙歸杭為臨平鎮將圭之將生信夢人謂已曰我當為爾子有二千石圭少有膽勇乾寧

中淮人圍嘉禾圭與其族人師魯守之淮人望氣者曰此雖孤城中有貴人不可圖也圭每與師魯登城樓張樂縱飲矢石交至視之晏如也嘉禾平圭以功授蘇州刺史開平中淮人復圍姑蘇屬正月望夜師營第盛陳燒燈之宴賊俘執者咸縱觀之圭以浙西營田副使檢校太傅終于蘇州師魯形短小而多智鏐嘗稱曰今之晏嬰人因號為曹晏嬰云

阮結

字韜文黃巢亂杭人建八都練兵結為之副中和二年從吳越武肅王征越州劉漢宏有功奏授散騎常侍已而攻毘陵平京口晉秩戶部尚書潤州制置使加刑部徐約叛憂悸成疾而卒

曹仲達

圭之子本名弘達後避孝顯世子諱更今名仲達生于臨平當母坐蓐時室有紫光家人咸異之稍長圭欲其習勞品膳悉與奴隸等即嚴冬尚未挾纊又日令運甕以苦筋骨尋為鎮東軍押牙圭在蘇州嘗乞婚于睦州陳詢至是遣仲達親迎卜之曰陳非偶也當聘他族已而道過錢塘武肅王奇其貌

遂以王妹儷焉累授台處二州刺史文穆王命仲達
 權知政事及建國拜丞相與沈崧皮光業同秉國鈞
 忠獻王即位仲達復攝行軍府事時賚諸軍軍中言
 賜予不均輒大譁舉仗不受賜諸將不復能制仲達
 親出階諭之辭旨曉暢皆釋仗而拜仲達性仁厚好
 施食不兼味文穆王雅重之每呼丞相而不名卒年
 六十二
 謚安成

宋

孫承祐 姊為吳越王弘俶妃因擢處要職累遷鎮海鎮
 東兩軍節度副使開寶初隨俶子惟濬入貢詔
 授光祿大夫檢校太保鎮海鎮東等軍行營司馬七
 年俶復遣承祐入貢詔俶以所部會攻常潤承祐從
 俶克毘陵功居多改中吳軍為平江軍授承祐節太
 平與國中俶來朝盡獻其地徙泰寧軍節度使從幸
 大名留知府事雍熙二年改知滑州卒年五十贈太
 子太師中使護葬子誘至駕部郎中出為淮南節度

行軍
 司馬

明

陳九思

其先鄧州人本姓鐵始祖堅為元守和州以城
 降明明太祖賜姓陳世襲杭州前衛百戶九思

長身偉幹有氣概初為博士弟子員萬曆十年襲父
 職又以武科授臨觀把總由保舉陞吳淞參將以禦
 倭功陞承平州副總兵歷真保薊津等處地方總兵
 官所至有奇績在吳淞操小舟出沒三江間大盜竄
 伏輒復禽獲倭勢披猖沿海亡命相為窟穴九思一
 夕悉戮之轅門與倭戰殲之海上性慷慨好施與窮
 交疎戚棄千金如唾後以病回籍萬曆時特旨召九
 思先是九思家居火起以手障火火即滅而手遂廢
 以病不赴有子爾琳為名諸生崇禎庚午黃道周
 為考官賞其文已註誤得乙遂曰命也乃謝去

李繼堯 字汝唐號梅泉原籍縉雲太保貞肅公弟也自
 幼警悟絕人年十四即食餼鬻序遊學武林值

楊應龍之叛時承平日久民不知兵選輒莫策繼堯毅然投筆曰吾祖恭愨公巡撫西粵羣酋叛服靡常猶計捕招徠今豈異時耶乃以儒生躬歷行間屢出奇計奮勇先登著有勞績累官為粵東叅將一時競稱其克繩祖武後謝職慕西湖名勝因家焉築凌虛臺著書自號凌虛子子四省教省啟省敬省政皆登仕版省啟宰淄川尤多惠政後擢光祿丞

章斐然

字華甫邑學生屢試冠軍遊大同值試武請于有司願入試矢矢相屬傍觀者駭曰是神臂將軍也遂中直隸宣府武解元是年為天啟丁卯授密雲縣中西二協副將統轄八路兵馬邊城倚為虎將

崇禎十一年九月密雲城危斐然以千騎死守不能破是時明將亡用人多不得其當斐然卒不能大有所建樹

毛文龍

字鎮南少落拓不治生事年三十餘走燕中不遇又之遼左為海州軍官漸至都閩晉總兵未

幾加都督宮保襲錦衣衛指揮使于是文龍益自奮勵築城脩樓櫓立火炮為守禦具甚備在海上日費朝廷數千金餉不時發文龍上疏云脫使士伍一日脫甲而呼臣雖萬死不能禁其如國事何廷議疑其跋扈遂使袁崇煥為邊督陰令圖之崇煥乃為書招文龍相見于近海岸一古寺攜手入幕中一勇士從傍運鎚殺之部下諸將士皆散朝廷知文龍枉死磔崇煥西市

國朝

姚士音

字伯玉性剛直重氣節 國初以平仙霞嶺功授福建浦城都司順治八年隣縣山賊蠡起士

音念浦城當閩浙孔道兵不滿百倘一失守浙東必為騷動于是招募鄉勇千餘人諭以大義晝夜隄防賊攻城者再親冒矢石敗賊三舍諸縣皆殘破而浦城獨完嘗勦賊入營見難民纍纍嚴誡兵卒不許妄殺按籍資糧俾之復歸有俘一儒士至者疑其非黨詢之果西令陸某因流寓被掠遂亟釋去後其子成

進士訪父始
聞誦德不替

論曰自古戡亂以武致治以文故周武克殷放牛歸
馬之後示天下弗服之義而祭公謀父亦言先王耀
德不觀兵蓋武之文義取止戈不尚黷武也我

聖朝應天順人以有天下定鼎江浙兵不血刃民安物阜
以來國家太平不事兵革錢塘遂爲人文之盛而南
方風氣柔弱生民皆安於畎畝以自樂不習武勇立
武功者唯吳越時聞有之今止一人而已豈非

聖天子之功德休養生息涵煦者深歟

錢塘縣志卷之二十五



錢塘縣知縣南樂魏嶺纂

人物 隱逸

唐虞之世有巢由而未嘗損堯舜之德建武之際有
嚴光而適以成光武之高非有特立獨行之操曷以
式頑立懦乎軒冕可榮而安於卜筮廟堂爲貴而樂
在槃阿彼夫具經世之畧而不爲世用者非矯也蓋
將以吾之可而易彼之不可固與經世之人材共持
世運者爾志隱逸

漢

姚俊

字翁仲少為郡佐負笈至太學受業明經術災異晚為交趾太守漢末棄官入增城山中學道師事

郭東延教俊九精煉氣輔星存心之術羅浮志云在東華宮中為北河司命

陸瑋

字文該後漢時納祿隱居於靈隱山

吳

范元琰

字伯圭少通經史兼精佛義居家不出城市雖獨居如對賓客見者莫不改容憚之家徒四壁

惟以園蔬為業縣令上言義行揚州刺史臨川王宏辟命不至卒於家黃壽丘負士贊云吳有元琰敏求

慧性既涉九經復昭三乘寂矣厭紛儼乎居敬藝蔬足老終違辟命

六朝

褚伯玉

字元璩雅有隱操居剡瀑布山下三十餘年徵聘皆不就王僧達為吳郡致禮聘之停車信宿

交數言而去寧朔將軍丘珍孫與僧達書曰褚先生涉景雲樓不事王侯自非折節好賢何以致之昔文

舉棲冶城安道入昌門于茲三焉却粒餐霞之士不且久羈望其返策之日暫紆清塵亦願助為譬說僧

達答曰褚先生從白雲遊舊矣古之逸人或留慮兒女或使華陰成市而此子索然惟朋松石介於孤峯

絕頂者積數十載近故要其來此真慰日夜比談討芝桂借訪薜蘿若已窺烟液臨滄洲矣君欲見之輒

當申譬齊高帝即位詔吳會二郡以禮迎遣固辭勅於剡白石山立太平館居之年八十六卒

杜京產

字景齊文學隱操為世所重徵召不起子栖自有傳

唐

顧非熊

况子性穎敏一覽成誦好辨說氣焰凌轢為眾所抑久不第而名存朝野長慶中放榜非熊復

下第穆宗怪之詔有司進所試追榜勅賜及第大中間歷盱眙尉慕父風棄官隱茅山

宋

林逋字君復祖克已仕錢氏為通儒院學士逋少孤刻志為學景德中放浪江淮歸結廬於西湖之孤山

真宗聞其名賜號和靖處士詔長吏歲時勞問逋居西湖二十年未嘗入城市將終有詩云湖上青山對

結廬墳前脩竹亦蕭疎茂林他日求遺稿猶喜曾無封禪書卒年六十一初逋客臨江李諮始舉進士逋

謂其有公輔之器逋卒而諮守杭為服總與其門人哭而葬之仁宗賜謚和靖先生仍賜其家米五十石

帛五十疋逋不娶無子教兄子宥登進士第諸孫大年始集其詩行於世

王衷字天誘政和中郡守監司表薦賜號悟靜處士視朝請大夫俸給

施德操字彥執楊旻字子平德操學有本末喜排釋氏旻安貧樂道不妄取與尤

嚴謹獨之操二人身塞而譽不宏里人嚮慕號德操為持正先生旻為謹獨先生與張九成合祠刑部侍郎程大昌作三先生祠堂記

徐立之

舊名炳學老子法隱於杭西湖之迴峯人呼迴峯先生迴峯今

徐夔徽宗朝賜號冲晦先生故廬在城中吳山下又嘗居萬松嶺

吳師仁陳襄為郡守薦師仁於朝充教授履行醇正器識高遠應舉不第退居田里甘貧守道專治誠

明義理之學

元

鄧牧字牧心十餘歲讀莊列二子書悟文法下筆追古作者不事榮名遍遊名山大川歸隱大滌山人稱

為文行先生所居有超然館宴坐累月不出時時作文以為娛所著有洞香記遊山志伯牙琴

張天雨 字伯雨宋文忠九成之裔早棄妻子從開元宮
王壽衍為徒工書擅詩歌文益奇古與吳興趙孟頫浦城楊載蜀郡虞集豫章揭傒斯清江范梈金華黃潛交甚善嘗屏居修茅山志因自號曰勾曲外史

周密 字公瑾宋寶佑間為義烏令入元不仕與趙子昂
仇仁近戴表元為倡和友詩極典雅善畫梅竹蘭石得意輒自題其上所著有齊東野語癸辛雜志

金應桂 字一之號蓀壁能詞章宋季為縣令入元隱居
風篁嶺書學歐陽詢畫學李龍眠築蓀壁山房左絃右壺中設圖史古器客至撫玩清談纒纒不休每肩輿入城幅巾氅衣望之若神仙云

陳渭叟 讀書學道賦詩有天然趣隱居葛溪上歲一來
杭城中名人勝士爭要致之惟恐其去也嘗有詩云一度詩來一見君只因芳杜襲蘭薰有時寫到遊仙句繞筆秋香生紫雲

崔彥輝 號雲林生與王蒙俱吳興趙氏甥善篆隸詞賦
畫亦超詣隱居賣藥鹽橋市歿無子有甥鄭為後藥室至今猶以崔氏署扁

葉森 字景修早從真白先生歌詩咸有法一時所與交
者如王真人眉叟薛真人玄曦張外史伯雨張承旨仲舉唱酬極富所著有瓦釜鳴集

俞和 字子中號紫芝隱居不仕能詩善書翰早年得見
趙文敏運筆之法臨晉唐諸帖甚夥行草逼真文敏好事者得其書每用趙欵識倉卒莫能辨

明

孫蔗田 不知何名隱於西溪以詩文自娛所著曰蔗田
集與同邑包大白名行相參人目為西溪二隱

潘時雍 讀書賦詩視富貴蔑如也城東二百步有地十
餘畝古井一宋輦院故基也荒棄弗治時雍購

得之除治一畝為廬其餘析而為畦種蔬天稍不雨置桔槔井上出井水以灌攝敝衣履巡行畦間見菜色青青覆地喜曰生意若此足矣掇其脆美以供父母其餘賣諸市自號曰灌園生

王謙 字自牧有至性父母歿歲時思慕哭盡哀有女兄以篤疾弗嫁奉之如母洪武初詔求前代遺逸有司以謙薦授中書進刑部主事尋上章辭歸

王遠 字志道一足跛博究子史家貧賣藥市中所著有蘭芷集

莫璠 字仲興隱西湖與劉士亨為詩酒友慕謝安石文文山謝疊山為人義氣橫發音節悲壯有烈士風

洪有恒 初名武昌或以名同國號聞孝陵召見御筆易後名授國子丞堅辭歸隱西溪潛心理學人皆欽之

陸晉 字德昭隱居甘泉里以教授生徒為業德性純良詞翰簡古人稱為八趣翁

周昉 字元亮號草庭讀書樂道以古人自期詩文典雅作小楷得晉人筆意所述有西崦稿

劉泰 字士亨負奇志特立不羣景泰天順間隱居武林城中蕭然環堵事母孝母卒號痛踰常鬚髮為白

所著有菊莊晚香雪餘倡和諸集

劉英 字邦彥為詩清奇俊逸翛然出塵當天順成化間隱居不仕與劉士亨趙廷玉霍孟陽俞鳴玉結社

賦詩名 賦詩名 振一時

王澍 字時雨寄興山水自號山人人亦以山人稱之貧鮮擔石儲口不言貧終身無所干請嘗偕胡端敏至滄洲遇盜劉六等數萬人圍城下數日不解山人為設方畧言之州官賊即解去胡大奇之遂為知己

而卒以布褐終其身卒之前月山人卧榻上見牖外車從甚眾又空一騎若將迎山人者一人執牌書曰齊東縣推判爭其人皆冬服山人悉以所見語內且曰吾死必以冬月已而果然

孫適 字孟博有詩名孝親友弟弟迪官禮部少與翰林王洪善洪家貧親老祿薄不給適周之終始弗渝

善行草尤精於素問鍼灸術
隱居甘泉里有東岩老人集

江浩 字道闇為人沉澹立廉隅與同郡張岐然剗為古
學約讀書社其法口經而及傳先考訂而後辨論
久為諸生隱河渚盡焚
所著書為僧名曰夢破

周大綽 字恢焉年十二為諸生十八遭父喪吳俗有乘
舉子業結廬父墓外設短垣幅巾草履
居其中四十八年不入城市八十二卒

王潼 字本澄幼讀朱子語錄遂無舉業之志聞陽明先
生講道箕山負笈往從配任卒時潼年甫三十六
不再娶性好遊歷齊魯燕趙登泰山攬日觀西望太
行薄遊都門並海百南遵吳道越東下武昌訪竹樓
赤壁之勝工繪畫善諷咏其過太行
詩有客中秋過半山外晉全分之句

汪瀕 字魏美弱冠舉於鄉與陸培齊名培成進士官行
人乙酉死於橫山瀕遂奉母居郊外徘徊吳山天

竺間布衣葛巾若退院老僧木落天寒淒風苦雨至
脫粟不繼寄食乾竺吟咏不輟三十年不入城市婦
錢歿不再娶竟卒
於西湖寶叔塔寺

賈愚 字少明少為郡諸生不售遂以懶仙自號布衣簞
瓢翛然自得居家孝友尤精翰墨邵康僖公嘗稱
其勇
退云

邵穆生 字汝宣經邦子為諸生年未三十感父廷杖事
棄舉子業隱於靈鷲山中築閣祀許由及唐宋
名賢為樓三楹中祀其父右自處藏書又三楹足不
入城市善畫有求畫者輒不與曰吾豈畫師耶所著
有山中甲子詩
文武林山七志

江之浙 字道信鑿子也弱冠餼於邑與虞宗攻宗瑤張
岐然及從兄浩為讀書社比浩舍族入山之浙
亦焚筆研絕意進取師事陸鳴燧慮難存恤無不至
及死而厚殮之周恤三黨孤貧闕後堂教授垂四十

年時同邑胡介亦奇士與皓善隱河渚長詩古文詞尤精研釋典死後十年淮東黃之翰刊其集行世

國朝

陸圻

字麗京拔貢生少穎異讀書過目不忘六七歲即能詩文運昌絕愛之性至孝事父母先意承志病

則割股以進負盛名士爭趨之圻亦樂為獎拔乙酉後為醫提囊三吳間頗奇效多所全活癸卯構奇禍械繫刑部時傳聞且不測同患者呼圻圻不應曰屬有所思吾方思陳東耳事解披緝方外變易姓名為向禽五嶽之遊絕不與家人通所著有詩經吳學威鳳堂集口譜諸書子寅成進士

吳瑗

字伯玉性孝友好學能文當魏闡擅權時眾競建生祠謀侵瑗父所建考亭書院地瑗毅然拒之生

平不好釋氏嘗曰人不師聖賢至老畏死則口作異域語求懺罪可嗤也順治間子鑛以進士司粵西瑗諄諄以公明平恕勗之兄弟四人年俱九十餘晚居湖上不入城市人稱一門四皓云

顧若羣

字不黨為諸生縱觀經史百家取新安鵝湖異同之旨而會通之以餘閒作詩古文辭嘗沂大

江涉洞庭彭蠡眺望匡廬越大庾嶺跨瓊海探奇攬勝文益橫恣後入雲棲隱於緇流所著有石公稿子鼎銓舉人知縣孫祖榮進士官編修祖愷乙卯舉人

沈晉垣

字亮宸九歲而孤已通五經侍母疾數年不解衣為諸生文名藉甚慨然有志當世尋謝去學

醫遇危疾應手輒活當事以疾召之無私謁益重其品浙人困徭役乃建議於范中丞行落甲催徵法至今賴之子四長穎錫授曲州令餘俱有文名

吳模

字求履性至孝割股救親為諸生有名中年謝去隱居鉄冶嶺足不入市聚書數萬卷嘯咏其中所

著有前史實用五倫奉持四書五經大易圖書解寶田堂文集等書

朱東觀

字全古博學通敏崇禎乙亥拔貢為昭陽李青所取歎曰詩有根柢學有本原奇士也丙子試

於南雍僅置副榜東觀長僅六尺具經濟才發論屢
屈其座人會鼎革棄去貢生籍迎母養於石人塢嘗
一至都貴游欲往見之匿不與見以涑水通
鑑裁酌未善盡為補輯卒死京師年八十

沈商書

字元伯少工詩文詞壇主聲氣者且十年已拜
一官旋棄去商書急人之難愈於已事讀書論

道娓娓不倦不立崖岸亦不事標榜澹然
榮利之外人爭以為知己及死慟哭失聲

胡介

字彥遠幼穎異為博士弟子每試輒壓人上身長
霍立性高介攝齊武步善為容端初為諸生不立

壇坵抗意而行甲申後退隱於河渚蓬門蘿屋與其
妻翁笑傲於溪山間翁武林巨族能詩有賢名夫婦

唱和欣欣自得介無子詩文工拙各半嘗命陸嘉淑
為刪薙之介死後且十年淮東黃之翰為刻以行世

關鍵

字六鈴少慧手執已業耳聽同舍郎所習皆通曉
無疑滯一日輒兼數人記誦塾師為之避席曰子

非吾所敢名弟子也當明萬曆時制舉庸爛婁東矯
以史漢雲間則浸淫六朝而臨川又步趨韓柳鍵與

錢肅樂讀書勝果寺錢引繩墨合規矩而鍵馳騁上
下汪洋志肆使讀心悖兩人同學相善而各樹壁壘
不相下臨川艾南英亟稱之而雲間陳子龍獨首推
鍵浙於是有關錢之學顧鍵沉深思為有用之學以
自見癸未成進士除知丹徒縣之官不半年棄官而
歸

皇朝定鼎之初求遺臣於江南巡撫蕭起元會江撫共題
為二十人而鍵在焉鍵辭以久病母老不赴家居以
名德自重閉戶著書絕口不言世事其同年生宛平
王真定梁以書招鍵而鍵不答兩公後皆宰輔每語
督撫曰君部中有吾故人子真君平之亞
也試為我問之後知其為鍵鍵亦竟謝

陸繁昭

字拒石行人司陸培子也培殉節死繁昭甫十
歲依母陳太夫人晨昏色養嬉戲如嬰兒會謗

書禍作闔門被逮母陳亦繫獄中繁昭時就遠館舍
遽歸里有沮之者曰禍且族曷為宗嗣計繁昭慟哭
曰母死兒欲生即生得為人乎遂赴有司自陳就獄
事白得出奉母讀書編摩經史為詩文最工四六有

善卷堂集行世單行側注絕去俳偶之迹尤善談論長筵廣坐中吐佳言如玉屑風流文采奕奕動人同學諸生先後掇高第去繁昭泊如也或勸之就試輒不應學使者張安茂廉知之檄有司令與殉節陳公潛夫子曾篁俱來繁昭上書陳情卒不赴曾篁亦辭不至曾篁年七歲父母俱沈淵死叔父祚明以教以育至於成人能讀書承先人志隱於岐黃間平生不喜見要人垂老閉戶食貧以歿

丁文策

字叔范號固菴學者稱爲江樵先生文策束髮讀書爲文另闢堂奧於是同郡陸圻圻弟堦應撫謙張右民葉大緯朱東觀柴紹炳陳廷會虞汝翼等創立壇坫天下翕然宗之名登樓已而謝浮名自號布衣奉其母偕隱於河渚當事聞其才屢辟召不就教授生徒又以醫者人命所寄乃自黃帝岐伯詰難以及長沙河間下至丹溪立膏肯堂所補救悉穿穴而研究之試輒應手愈兩應督撫之聘纂脩通志及府志制府宴諸君於貢院酒半酣命吏乞詩文策信筆酬答竟老布衣爲獨行遺民卒年八十有一所

著有西湖集瑣言放庸集夏聲百歲序諸書傳於世

張右民

字用霖其先閩人祖國善以明經遊學武林會無所不讀啟禎間與龍門諸子創爲登樓文選風行宇內值闖亂條時務十四事欲上達南都且致書中丞劉宗周而著卦得遯不果行乃隱處城之東偏講學受徒遠近負笈者咸集毛先舒以古文名家亦出其門康熙癸亥與脩浙江通志郡邑志

詔舉

天下博學鴻詞鄉先達以右民薦固辭爲人外溫和而內剛介砥礪朋儕獎引後進主持東南名教者垂數十年年八十三卒學者稱爲東臯先生有東臯文詩集甲申疏稿史論史畧竹憲語錄凡若干卷學院周允興請崇祀鄉賢

錢士璋

字章玉少隨父任京師明習朝典稍長諸生祭酒負經濟才歲大禩當事爲粥以食餓者擇紳士方正主之以士璋薦計口授餐民皆捧腹道有饑死者出私財瘞之民苦於徭役士璋建議爲條鞭法

以均之著為令在甬上值海寇亂士璋出奇計定之
舟山以安薄遊天台因號赤霞山人後歸西湖見石
山壁立有篆刻赤霞字符其號遂築菟裘終老焉善
吟咏工草書尤精繪畫得宋元人筆意所著有赤霞
山庄集無疾而
逝年八十有五

王元佐

字又章父二瀛仕為尋陽參軍元佐髫年隨父
任即能代治簿書二瀛解任歸里元佐孝養唯

謹雖幸車服賈不廢讀書為人重孝義敢任事國
朝鼎建之初邑令顧咸建伏節死無敢殮者元佐為
之倡與章華許昭遠合詞以請於貝勒王許之於是
始殮而遂其喪歸里慕陶靖節孔稚圭之為人卜居
胥山之麓郡守龐顏其堂曰景陶跡孔以風
世云子道寧邑庠生有小學輯韻編行世

徐介

號猶次明諸生年十六隱河渚父母卒短髮不脩
縞衣練冠六十年如一日偶夢胥吏捧冠帶迎之

叱曰我處士也又安仕耶吏曰上帝有命不可違已
而遍別同好無疾而終門弟子仍以白衣冠殮之

蔣名登

字高卿明侍郎蔣驥後家貧甚父維賢腹患疽
創入寸餘洞見臟腑皆云不可治登療之百方

少愈然患處口張卒不可合醫命切肉投之痛少止
肉銷痛即劇由是日需肉筋許寢始安歲大饑斗米
千錢市肆斷屠割間遇肉非多錢不可得登年才十
五家無一錢百計求所以得肉者乃亦竟得肉如是
數月疾良已越三年而母與父相繼歿其孝如此登
幼讀書能文以貧棄去從名醫吳玉涵遊盡其學病
者延之投劑即起繼復棄去為賈所得貨輒贖軍中
所掠婦歸其夫嘗估齊梁間喟然曰吾身無贏錢然
願以此徧觀天下名山水以娛其身遂上泰山登繁
臺涉河朔淮卒垂橐還登操履方正言論篤實喜面
折人過人多憚去晚年布衣糲食優游林谷間人方
之墻東王君公士室袁閔云登卒長子弘德繼歿次
子弘道事母孝每朔望必造父墓拜且泣

費之純

字式文為人恬澹沉冥不求仕宦亦無貴顯交
好讀莊老書怡然自得卜築城隅以吟咏自娛

自稱逸老慕張伯雨孫太初之為人其子承埏亦有父風之純病時承埏奉父命之吳淞歸而父歿一慟幾絕遂戒葷酒數十年家雖貧每年製良藥施捨以濟病者不祈報而全活甚眾教子弟讀書務聖賢窮理之學

胡湏 字克生少從司農嚴沆學得聞道於三嚴先生喜學書前輩俞時篤者工虞祿書誨之曰當從顏家廟碑入手從此精進益工篆隸書自逸少以下及唐宋明諸家一經臨摹無不髣髴神似性僻喜與貧賤

交常罵富人勿與通尤精鐵筆頗能詩詩多作解脫語死之日友人章撫功往為棺殮後三年門人蔣弘道葬之 青龍山

施元龍 字葵友早慧有名諸生間下帷於梵天精舍刻勵勤學經史諸子百家之外於天文地理河洛

諸書無不博覽以勞致疾乃喟然曰吾聞古人有以醫隱者何必功名哉更取素問內景岐黃之書精研

之遂大通醫理會父喪辨踊號泣日嘔血不止自知不起謂其妻孫曰亟焚吾書無庸也唯醫道可自濟以濟人吾所註醫書俟兒長後當以是授之卒年三十有二子貞珉亦有俊才弱冠補博士弟子以文行見稱然其母孫苦節聞父遺命竟以醫行世云元龍所著書有理學發明閱史偶存百尺樓詩數十卷

論曰逸民昉於魯論商周之際僅得七人而聖人猶抑揚其辭其旨深矣沮溺丈人亦隱者流而不得預於逸民之列以為非夷齊諸賢固不足以當之也後之作史者不深維聖人之義乃取而合之亦淺之為見矣然秦漢而下其有志潔行芳不與時為汚下者當亦聖人之所共許也夫依世則廢道違俗則危殆

古人之所以難受爵祿者其以此歟若夫大隱在朝市而無關於世運者亦奚取焉

錢塘縣志卷之二十五

錢塘縣知縣南樂魏嶸纂

人物 流寓

古之流寓必若長安之載鄭子真种放洛陽之載虞卿司馬相如桐廬之載嚴光吳中之載梁鴻戴顓山陰之載謝安王羲之始為不爽地與人兩相重也茲邑湖山既勝流寓亦多上世既患其考之不精近代又患其登之過濫一仍舊志尚有未愜於心者俟後之君子再考焉志流寓

唐虞

許由 穎川陽城人武林山有稽留峯太平寰宇記云許由葛洪皆隱此志返故號稽留洪武志則又辨之

謂晉時許遠游棲止之地訛為許由毛先舒許由灘辨云巢許之說多屬寓言雖太史公亦疑之今仍歷

志從之

戰國

荀况 又名卿趙人相傳讀書荀山今荀山寺是其處也

六朝

謝靈運 會稽人屬文美麗俊發名在顏延之上襲爵康樂公宋禪後為永嘉守肆意遨遊幽峻必造幼

時曾寄養杜明師家杜預夢有賢人相訪翌日靈運至遂建夢謝亭亦名客兒亭亭在靈隱山側

朱世卿 梁鹽官人有別業在武林山榜云隱士鹽官朱世卿墅

徐孝克 少有力辨能談元理侯景亂東游錢塘寓佳義里與諸名士討論經義并及釋典道俗受業者

數千人

唐

駱賓王 義烏人七歲能文與盧照鄰王勃楊炯齊名稱四傑仕至侍御史以天后即位頻上章疏貶臨

海丞文明中與李敬業起義廣陵業敗遁靈隱山為僧宋之問至寺夜吟不屬賓王隔垣朗吟終之世所

傳樓觀滄海日門對浙江潮是也質明求見則避去矣竟卒於寺今天香院是其隱處

陸羽 字鴻漸竟陵人不知其所生既長筮得漸之蹇曰鴻漸於陸其羽可用為儀因以為名氏上元初隱

茗上自稱桑苧翁或獨行道上誦詩擊木裴徊不得意則慟哭而反時謂為接輿也有靈隱碑記惜不傳

陸龜蒙

字魯望居松江甫里不喜與流俗交設蓬席齋束書茶竈筆牀釣具往來時謂江湖散人嘗至

靈隱晤丁飛之作

丁隱君歌相贈

五代

何溥

越州人識雲氣善地理為南唐僕射大夫國亡掛冠隱芙蓉山假蹟禪門不談僧話今石屋嶺有祠

宋

潘闓

字逍遙大谷人居太廟東巷通易春秋尤以詩名落魄不羈交遊皆一時名俊以預虛多遜謀立秦

邸太宗下諸路大索闓刺鬚髮衣僧服得逸曹彬疏以四門助教招致之遂卒於泗一云真宗釋其罪以

為滁州

參軍

徐復

字希賢莆田人家於杭范仲淹守杭數就訪問復為人占無不奇中精易卦天文地理旁及遁甲占

射律比諸說康定中元昊叛詔求文武材宋綬林瑀以復薦名見欲官之不就辭歸遂禮以束帛賜號冲

晦處士年幾八十居吳山下

沈文通守杭榜曰高士坊

韓世忠

字良臣延安人屢立戰功追封蘄王紹興中秦檜當國以和議不合疏懇解樞柄周游湖山間

建亭飛來峯之半顏曰

翠微自號清涼居士

朱弁

字少章婺源人紹興二年遣使問安兩宮士大夫無敢行者弁奮身應詔使金人百計迫之誓死

不屈嘗偵彼中虛實比和議成得歸獻金國所得六朝御容及宣和御書畫述北方所聞見事狀帝高其節有進用意秦檜沮之僅轉奏議郎卒於臨安稽留山後四十年從孫熹官浙中卜葬積善峯下世其家焉

陳剛中

福州人建炎初任太府寺上封事議恢復遂與張九成七人同謫其詩云同日七人俱去國何

時萬里始還家以勞感瘴而卒還葬臨安

范成大

字至能吳郡人紹興中官至吏部尚書叅知政事以病請領洞霄宮居杭棗木巷今巷西石湖

橋因其號名也素工詩高宗嘗書石湖二字賜之所著有石湖集攬轡錄桂海虞衡志湖船錄等書行世

周輝

字昭禮淮海人紹熙間居清波門之南嗜學工文當世名公卿多折節下之家藏書萬卷父子自相

師友撰清波雜志十二卷

孫惟信

字季蕃工詩善談謔嘉定初棄官不仕寓杭湖山間自號花翁歿趙與籩墓之西湖旁

宋斌

袁州人少從學朱熹時學禁方嚴羈旅困沮年且八十臨安尹趙與權以父事之死葬西湖旁

謝翺

字臯羽福州人自號晞髮子至元末家西湖上聞文天祥被執翺悲不能禁失聲哭桐江有子陵臺

孤絕千尺時天涼風急挾酒登其上設天祥主拜跪伏酌乃取竹如意擊石作楚歌招之性好佳山水遇

卽恣意游覽歿後友人移柩葬于陵臺南初翺以朋

友道喪作許劍錄未就隱者方鳳爲作許劍亭於墓

有文集三十卷行世

元

虞集

字伯生臨川人官至奎章閣學士與鮮于伯機揭曼碩楊仲弘趙子昂黃晉卿諸公友善少游錢唐

故於靈隱多所題咏

胡長孺

字汲仲永康人少淹博至元由薦入爲修撰以疾辭歸寓虎林山下慨然以孟軻自許誘引後

學不倦其文章爲時所知屢典文衡十五卒所著有石塘文稿五十卷行世

鮮于樞

字伯機漁陽人仕元爲江浙行省都事因居焉風流文雅善詩歌尤工翰染與吳興趙孟頫雅

相伯仲

臧夢解

宋末舉進士元初官廣東廉訪使老病退居杭州博學有操守所著書有周官考三卷春秋發微一卷自號魯山

楊維禎

字廉夫會稽人毋夢金鈞入懷而生泰定間進士再轉鄉郡監司令居官以狷直傲物不調者十年會四海兵亂浪蹟山水間居杭甚久始卜宅吳山鐵冶嶺故號鐵厓繼得鐵笛更號鐵笛雅好聲妓名徹都下所著有史鉞三史正統辯胡傳補正富春人物志古樂府麗則遺音西湖竹枝詞數百卷明太祖徵之不至獻詩有皇帝書徵老秀才秀才懶下讀書臺之句聶大年題楊廉夫集云文章五色鳳之雛借酒詩豪膽氣粗白髮草玄楊子宅紅粧檀板謝家湖金鈞遠夢天星墮鐵笛聲寒海月孤知爾有靈應不死滄桑更變問麻姑吳寬題鐵崖墓志云泰定年間名進士會稽山下老徵君金陵不看三秋月玄圃長嘯五色雲對客呼兒將鐵笛從人笑我作紅裙風流盡付吳淞水還繞劉伶四尺墳二詩人多傳之

丘世良

字子正父疇由台州徙錢唐良幼穎悟讀書過目輒解父喪奉母以居日益貧教授市中經史百家之言靡不蒐究用薦為海鹽杭州教授仕終松江府丞所著有梯雲集六卷隨筆二卷

貫雲石

其父元忠臣阿里海牙之孫名貫雲石遂以貫為氏卜居鳳山門下自號酸齋神采秀異膂力絕人稍長折節讀書為文不蹈故常元仁宗時為翰林學士稱疾還江南賣藥錢唐市中結廬龍華山詭姓名易服色人無識者

郭彥澤

河南人少有氣節高自稱許有葛先生者神於醫盡以其術授之避地武林自稱曰洛下遺民

陳栢

號雲嶠性豪宕喜結客嘗被命監鑄祭器於杭倪元鎮慕其名來見張燕湖山間餽米百石栢命從者移置近所舉豆觥引妓樂悉分散之顧倪曰吾在京時即熟爾名汝乃欲以米沽我耶請從今日絕交居錢塘不樂小官怒罵宰相年踰六十不得志而死

繆倫

字叔彝東平人侍父宦游錢塘至正中淮兵寇城執其父將殺之倫哀號乞免弗聽傾家貲以贖又弗聽乃自縛請代於是殺倫而釋其父

張昱

字光弼廬陵人至正中為江浙行省左右司員外張士誠起棄官不仕以詩酒自娛號一笑處士明高帝聞其名召見欲官之因其老曰可閒矣又號可閒老人處西湖上簾衣糲食讀書賦詩以適其志著有左司集

薩天錫

雁門人寓杭風流俊逸杭之山水多所題味

陳基

字敬初臨海人九歲與兄聚從師於杭寓觀橋之陋巷夜雨暴至張蓋就寢不顧自扁其軒曰三嘆讀書不輟已受學黃縉授經筵檢討尋轉江浙行中書省郎中請葺岳飛墳祠致祭自為文刻石墓上出官錢補刊西湖書院經史板洪武初召修元史成賜金還卒於道有彝白齋稿二十卷

明

鄧林

南海人初名善觀以南昌教授擢吏部主事成祖更之曰林後居杭詩文為一時冠

孫一元

字太初秦人也善詩有逸才意態超脫往來杭湖間居南山淨慈寺最久費文憲宏為相日訪一元於南屏一元臥不起久之出見曰海上碧雲起直接天台赤城大奇大奇絕不交一語文憲益重之

王守仁

字伯安餘姚人鄉舉時讀書南屏後擢宸濠忽傳王師已及徐淮遂乘夜過發至錢塘謝病作詩云靈鷲高林暑氣清竺天石壁雨痕晴客來湖上逢雲起僧住峯頭話月明其意蓋在靈竺間也寓居湖南淨慈寺成詩六首南屏有陽明洞以公號名嘗建天真精舍於龍山之陽即今勳賢祠

薛侃

字尚謙揭陽人嘉靖間登進士具疏有定國本辨人才等語時末嘉方柄國而貴溪新有寵患其偏已思去之適有袖侃疏草者密獻末嘉末嘉入言此夏某所為將導薛侃上疏不數日疏果上上大怒親

鞠令必引憂拷掠無完膚竟不變詞侃為王守仁門人歸遂築天真精舍祀守仁其中與同志講學精思力踐且為戒於後曰此講學公所
後世王薛子孫世世無所干預

諸燮

字子相餘姚人少負奇氣除兵部主事以簡伉忤大僚謫茶陵南歸居錢唐區曰梅隱隱居教授執

經授業者如雲後倅潮陽丞邵武皆有惠政棹過嚴陵濯足灘上溺死歸葬錢塘石屋山白鶴峯下

祝時泰

閩縣人博雅善詩嘉靖初鄉舉官員外掛冠歸慕錢塘湖山之勝卜居西湖與郡人沈仕輩結

玉岑詩社遨遊嘯咏以終其身

黃省曾

字勉之吳郡人博雅工文詞與錢塘田汝成交莫逆嘉靖中來遊西湖就居南屏最久自稱五

嶽山人瘦骨輕軀涉險不假筇策湖山之勝歌咏殆遍著述數百卷行世

馮夢禎

字開之秀水人萬曆丁丑會試第一移居杭城築快雪堂於孤山上讀書其中曠達真率精人

倫鑒海內名士無不望門投贄嘗為祭酒引拔後進皆成名士世比之郭有道詩類謝康樂文類蘇長公走筆立就多不成稿制舉業有剩技二卷與錢鶴灘唐荆川共傳晚製桂舟貯書載歌妓遨遊西湖竟月不返亦時與僧蓮池邵重生虞淳熙兄弟朱大復諸公結放生社人以為無愧白蘇時入社者有司理徐桂字茂吳餘杭人博學工詩長於味物又祠部屠隆字長卿四明人賦味甚富皆夢禎同年友一歲俱卒
宋登春 新河人號鵝池山人性豪宕酒酣輒罵坐嘗謂邢笑之忽渡江詣徐宗伯學謨寒暄未畢趣蒼頭買舟觀錢塘江潮適中秋潮勢甚盛扁舟衝之乍沉乍浮轉盼而歿

莫叔明

字公遠長洲人一名更生自號冷泉子性高邁動法古人年十七入卽好為詩險詣卓絕忘情

世味簞瓢晏如後徙居湖墅古樹清流卽其地葬焉王世貞為志曰明詩人莫公遠之墓

唐新

字仲可蘭陵人工詩愛西湖之勝買一舟居之舟名蓮葉往來烟雲浦嶼間嘗至絕粒采蓴而食孝

廉吳之鯨憂其乏絕為疏以傳知已有云唐仲可夷猶烟水欸乃蒼波瓶中不堪喂鼠榜畔可以鷗眠七

十二種惟有蓴羹一十二時嘗遭水厄云云約共解囊以贈新聞之嘆曰吾寧可以口食為諸君子累哉

竟謝歸

萬表

字民望號鹿園鄞人父椿寧波衛指揮使性篤孝痛父椿早世事母謹年十七襲指揮使慷慨尚氣

節不問家人生產嘗書武侯淡泊寧靜四字於坐間正德己卯中武鄉試第一庚辰會試擬第一以語多

指斥稍抑之擢都指揮督全浙運至淮見飢民載道不俟奏報輒發所運米賑之全活無算尋晉浙江都

閩再遷南京大教場坐營歷官漕運於河渠利弊極意興革尋謝事家錢唐一日倭寇逼省巡撫王抒巡

海上藩司游居敬倉卒無備人情惶擾就表問計悉選少林僧兵二百名遣其婿杭州衛指揮使吳懋宣

統以出戰焚其巢穴大破之省城獲安朝廷求將才起都督同知僉書南京中府事力疾就道賊犯蘇松

急鬻產募兵以進與賊遇於楊涇橋首挫其鋒身中流矢裹創血戰賊始遁去後胡宗憲遣邑人蔣洲往

日本招汪直皆表本謀也生平博洽羣書為文敏給踈暢直抒胸臆所著有玩鹿亭稿經濟文錄道德經

贅言灼艾集諸書行世輕財好施所得祿常以之周宗黨年五十九卒子達甫受業王龍溪唐荆川之門

與兄謙甫俱好讀書居父喪三年不飲酒食肉不履內室已棄諸生襲爵歷官至福建都閩廣州駐防叅

將所至皆有政績年七十三卒所著有皆非集孫泰中崇禎丙子科浙江鄉試志行純雅篤於友誼性好

山水絕迹不上公車

嚴大紀

字汝肅嘉靖戊午舉順天鄉試乙未成進士授行人氣岸卓然時分直當國欲羅致天下士以

紀同姓年少而才慕之尤殷懸顯秩相待使人微語紀紀遜謝相啣之人為紀危紀自若也嘗冊封有餽

遺例紀力却之歷禮曹郎擢江西僉事備兵湖西會
 安吉兵謀紀冒險定亂撫定餘黨叅政河南鐵雲松
 三河劇寇臨事制變皆中機宜已又移江西時豐城
 縣庫失守株連甚衆紀設方畧購得真盜理出誣服
 者數百人武寧洞鄱陽湖爲巨盜淵藪紀密遣卒爲
 商賈狀偵其山谿道路然後調兵內伏外攻搗其巢
 朝廷知其能令備兵井陘治戰士守險要劇邊賴之
 陞山東按察司奉旨看山西溢田踰原額二百頃有
 奇例當科稅紀獨謂山右地瘠民貧朝廷捐有餘以
 活貧民於正賦無缺令被此格外恩可也乃止陞光
 祿卿旋轉太常卿會壽陵之議與時意忤執政嫉私
 人撫以他事論奏遂拂衣歸紀秉義持重屹如山岳
 生死利害不能撼搖仕不竟其才居家孝友淳至遇
 親舊隣里謙和周恤卒九年朝論始定錫諭祭葬子
 三長調御次武順少救皆名
 儒能世其家學並祀鄉賢

僧如曉

號萍道人蕭山人幼不知書不自檢年二十餘
 以罪逃臨安山中獨棲古廟十餘年深山月朗

行見影在地豁然有省折枝畫鑪灰遂善書矢口吟
 哦多佳句乃出遊三吳瓢笠自持遍遊宣歙剡中台
 宕諸名勝老乃駐西湖結茅烏石峯
 側名曰巖艇八十餘卒晚著萍香集

吳紹昌

字有聲歙縣人寓錢唐世家世貴顯紹昌以名諸
 生屢中副車發憤經史庚午赴試陪京卒於潤
 州紹昌性孝友與弟君揚相愛賦性嚴重有故人子
 來謁驕不拜床下紹昌責之曰吾若父友也不可以
 成若過命拜而後見同里有負人百金迫除夕且死
 紹昌悉以金授之與錦衣于某交始終勿替某忠肅
 後也時繼襲未定主爵者索賂
 幾不得紹昌力任其事爭乃定

汪翥

字念初歙人萬曆乙卯科舉人上邊策特賜進士
 歷任遼左累官至總兵方援勦高麗駐兵覺華島
 天啓初閣部孫承宗經畧遼東委翥司陶事築寧遠
 城及崇禎年間與經畧議不合棄職歸隱錢塘之安
 溪山嗣方一藻受命經畧迫起之加都督同知賜蟒
 玉師駐松山兵寡糧盡力守年餘城陷死之子僑字

思古甫十二齡痛父骸不歸遍歷險艱尋骨疆
場出九死一生奉母還里人咸稱父忠子孝云

吳本泰

字梅里少有名屢困棘圍以明經貢京師舉崇
禎順天癸酉鄉科甲戌成進士年已六十有二

以行人改吏部文選郎入為尚寶卿年八十餘卒本
泰初籍海寧後樂錢塘河渚而遷居焉遂為錢塘人
性澹泊無嗜好繩床斐几朝藿暮鹽蕭如也與高僧
耆舊相往來其弟太冲稱之曰吾兄如千頃澄波搖
之不濁甲戌之捷與陳際泰張
懋忠同出湛持文相國之門

國朝

葉紹泰

字來甫吳江人父兄並以甲科顯隸嘉興縣弟
子員補廩餼移寓錢唐與諸名士日往來詩酒
博學高文尤淹緯候之書所輯古文鴻寶晉魏別解
紙貴當時卒年三十六赴喪百餘人盡一時名士朱
東觀為之
銘其墓

王紹隆

字綏山海昌人移居於杭 國朝丙戌舉於鄉
已丑成進士由庶常至弘文院修撰已亥出為

江南布政司叅政分巡江寧適京口有海氛之變犯
瓜儀諸郡羽書日至紹隆沿江閱視馬道三晝夜馳
數百里歸畫形勝定壁壘繕甲冑籌糧餉人心始安
事既定瓜儀婦女俘於軍中者紹隆悉出之曰此吾
民也江上逆案發畏訊者互相連染紹隆曰愚民畏
死即偽從之豈反側耶當事從其言歸杭後以詩酒
終其身

陳鼓永

字雍期號學山海寧人父之暹崇禎丙子舉人
遷居於杭鼓永以順治戊子舉於鄉乙未成進
士選庶常歷司成東閣學士吏部左侍郎擢左都御
史晉工部尚書鼓永神觀偉然風儀修整少時具公
輔之畧為

世祖章皇帝所器許已而父之暹以兄弟故連坐吏議將
遠徙鼓永上疏父老願以身代且引父出繼例詞旨
凄惋踰年始得歸屢克經筵講官當 上意任左都

御史值閩逆之變上疏請蠲全省課額以甦民困又請表揚死事諸臣以植倫紀俱優詔報可丁外艱歸家未幾卒鼓水性廉潔一介不苟以子恩蔭推與其弟人以為難謚文和賜祭墓墓在雲嶺下

祝文球

字雍來海寧人京兆以函之孫也文球父守熙早死事母朱至孝性恂恂和易處人父子骨肉

間得文球一言則相悅以解蓋文球能以至性感人不立崖岸亦不為阿附故人慕而樂從之當國初

社事相爭攻擊不已文球為朱一是甥不立門戶一是亟稱其賢乙卯舉於鄉文章為名流所重未幾卒

十年五

萬斯大

字克宗鄞人父泰崇禎丙子舉人復社名宿鼎革家落事父至孝不以兄弟八人推委秉性剛

毅見義必為為其師黃宗羲所畏憚隱居教授研精經學尤邃于春秋三禮所著有學禮質疑禮記偶箋

儀禮商周辨非學春秋隨筆等書行于世以高曾墓在錢塘遵遺命孳子寓焉卒年五十一子經世其學

康熙癸未進士今

任翰林院編修

汪之萼

字含章歙人幼有異姿弱冠時母閔邁危疾中夜肅衣冠拜於庭願以身代隨封左臂肉二寸

許投藥中母霍然愈讀書不屑章句內行端謹力周諸從昆季之急尤以古人相勉勵不從則閉戶自責

弟兄感其誠泣謝乃已素行德於人不望其報嘗語諸子曰我以惠自居而期彼以報是交相市也早歲

好道謁西陵山水之勝乃從黃海來錢唐父母卒塋南屏之麓構廬其旁榜曰壑庵遂不復歸未幾卒於

山中壑庵在

南屏山左

吳昕

字仲徵徽人喜武林山水遂卜居焉善詩賦喜賓客為人瀟灑洒出塵尤善畫司鐸永嘉造士皆有法

晚嘗曰吾欲棄妻子一遊五岳盡攬天下奇勝一夕卒昕性通豁無城府與縉雲鄭賡唐交最善著有松

臺集

林嗣環 號鐵崖泉州人順治己丑進士授廣東海南副使攝學政愛養士子後以籓兵事削秩歸慕武

林山水僑居湖上與曹秋岳王西樵相倡和卒葬西湖之白沙泉

戴朝立 字茂才父樊由新安遷杭朝立事父母先意承志於兄弟篤愛歷久不衰性剛方然諾不苟自

處儉約不蓄私財不飾車服不履公庭遇人緩急竭力營救之賑貧解紛無望報念生平多隱德人咸稱

為長者以子璵封內閣中書舍人

吳文翰 字元濬有至性讀書攻苦幾失明補郡庠生亡何入龍泓山中懷古著書時與方外為蓮社遊

登山賦詩寄托高遠郡守稽宗孟思見不得乃屏車從就山中見之寒暄外無一語及世事守嘆賞而去

戴班立 字茂齊新安人寓錢唐父年七十一生班立兒時事父孝十八而孤哀毀骨立補諸生入太學

友人朱某為人中傷班立竭力營救後以千金酬弗受也嘗買一婢詢知杭望族遂以女畜之擇良配歸

為丙午歲郡城火延數里捐數百金托僧周濟以子普成貴封儒林郎

鄭世迎 字寅賓新安人遷杭已三世博學負奇氣試輒冠軍壯歲客長安名公卿爭相延禮詩歌援筆

立就屢躓棘闈遂謝棄帖括放浪山水間慷慨然諾急朋友事如已事咸黨待以舉火者率數十家嘗為

友營救身家人咸倚之為重游屐所憇朋觴雜遝有書帶草堂詩稿行世弟世遴最工詩文惜早卒諸子

皆有文名

吳夢鼎 字仲鎮徽之休寧人寄籍錢塘為上庠諸生崇禎庚辰科薦舉入北京國子監肄業四方士大

夫聞名爭相交行文如長江大河不屑屑尋蹊徑學者至今傳誦之順治二年巡撫張以夢鼎才委攝知

蘭谿縣事中途遇賊兵不屈以死生平尚義氣信然諾見義必為其父敏思建城東土橋新壩夢鼎實左

右之費數萬金利國便民為百世不朽之功迄今士人呼為吳公壩云子五曜珍暉暉明曜廣東惠州府

丞曠廣東
錫山守備

凌起翔

字紫雲歙縣人少好學尚義行及長隨父往來

之詣翔者日益甚翔曰喜好行其德家遂中落翔

兄弟三人其次弟嘗山創甚幾斃以救免創愈後

飄然遠去不知所之以十年不歸翔畜其妻若子復

授之業父老且病翔以孝養備至其友以事之京師請

翔與俱翔辭以父疾行至山東禱於獄神卜父病不

吉即策騎遄歸侍養又二年父以天年終與弟起潛

尤友愛推財分業曾無間言教其弟之子不異已子

愛人讀書殷殷勸勉而欲成就之蓋不問親與疎也

蘇人有老嫗售於旅病甚主遣之而索其直翔為之

代償復訪得其子而歸之王文甫者負稅課百餘金

吏榜笞以百數王親黨知交莫之誰何知翔名急以

情告翔立為償而事得解關吏聞之亦重其義遂深

相結納其他濟人緩急不以在亡為辭者事多類此

子賡臣年十五歲亦隨父至杭翔為訪師得章撫功

從游十餘年博學多通受知鄭學使者補博士弟子
後舉丁酉科順天鄉試起潛子如煥成進士官翰林
院庶吉士翔為人敦行樂義動法古人年
僅六十客死於杭遠近聞者皆哭失聲也

論曰余按吳越當春秋以前皆尚貢揚州之域而泰

伯始開國於吳伍胥身浮於越則志流寓者唯此二

人足以當之而以許由為寓賢之首非也史記余登

箕山其上蓋有許由冢云此太史公疑詞耳且箕山

在洛由潁州人葬此山而舊志以武林之稽留峯為

箕山誤矣錢塘自唐宋以來實為名流萃止之區而

宦遊所至往往多留連不能云至長子孫者有之其

湖山之美徧高賢之題咏兩峯三竺多隱者所盤旋
琳宮梵刹縑流羽士之潛踪峻宇雕牆巨室大家之
遷徙加以東連江海北趨淮楚富商豪賈之輻湊稽
其版籍幾過土著矣然其來者半去者亦半不足言
也若乃名在天壤而身同編戶棲遲巖穴而隱約東
陵騷人負屈宋之才經濟饒賈董之策美踰竹箭譽
重南金功著旂常名馳北闕雖出處顯晦之不同皆
足以增山川之勝而銘之竹帛非所謂維楚有材晉
實用之者耶

錢塘縣志卷之二十五

錢塘縣知縣南樂魏源纂

人物 耆善

孔子曰十室之邑必有忠信孟子曰一鄉之善士斯
友一鄉之善士大行受大名小行受小名志家所當
兼采而並收矣錢塘舊志有人瑞似乎得於天而成
於人者少非所以勸也易為耆善若曰善故耆也去
孔子仁者壽之意不遠且人瑞中男女並登亦似不
倫今別為壽母而附於列女之下志耆善

宋

龍廣寒

江西人移居錢塘挾數學能預知又行服氣導引法嘗佩小龜十數枚于身至晚乃解飼之游湖海間皆推為異人事母至孝六月一日母生辰方舉觴為壽忽見北窗外梅花盛開一時以為孝行所致遂稱曰孝梅廣寒卒時年百有八歲猶童顏絲髮云

明

丁保保

字艾庵其先河南人扈宋蹕南徙錢塘至保保八世矣元初授提領職入明以耆年賜九品服授太守廳事太守訊以政保保曰野人何知古云與眾同欲則濟儒久賤願貴之農久困願甦之政久苛覈願平之僧伽尚橫願戢之惟反古政加以寬大民咸得所矣太守敬謝年九十七卒子貴年九十亦賜九品服又三年乃終

鮑相

善吐納以占術顯于世晚節一切謝去築室賜田側不入城市胡總督宗憲王新建守仁嘗求占皆奇中壽一百二十有一終於室改室為墓域塋焉

袁文玉

喜山澤游築室柳州亭左露桃煙柳間每喜獨行堤畔比游人出則負杖回惡聞簫鼓聲嘗誦左思詩曰山水有清音何必絲與竹生於正德戊辰萬曆戊申年百有一歲猶強飯健行矍鑠未艾也

葉春先

字和伯父履諸生嘉靖間倭寇杭提學院鸚率諸生登陴守履門于武林時湖墅居民入城避亂者數萬門閉不得入皆號哭城下履請于鸚門啟而入全活無筭以守城勞死時春先年十歲及長好周人急待舉火者恒數十家年九十四美顏色健步履一夕預戒子弟孝友勤儉力行善事言畢端坐而逝子振藩崇禎丙子舉人

國朝

沈汝楫

字濟蒼仕光祿寺署丞醇德長者年九十九臘月日卒先數日絕飲食與家人訣歌司空圖休休亭詩或謂盍少待作百歲翁乎曰天地之數惡盈人生亦何必定百歲儻然而逝

馮子卞

字回初錢塘諸生篤學力行以經術傳弟子為大師生徒數百人其最著者如湯煥許光祚年九十二無疾而終子廷槐年八十八孫昌世年七十九曾孫士驥年九十士駿年八十一四世皆登耄耋

姚士章

字斐成生而穎異與人交無疾言遽色煦煦然如坐春風化日中性好善見義必為甲寅遘耿逆之變婦女流離者輒捐貲贖之仁錢兩邑因囹罪人每患疾疫士章獨力輸金改卑濕為高燥又念三歲大比士子萬餘人露頂赤脚擠甬道中或秋陽暴烈或風雨驟至無可趨避乃剗設蓬廠以庇之并製羶衣數百件以餽衣單者至今赴選而來人人有廣廈萬間之嘆方伯馬建育嬰堂聞士章好善名禮請董攝士章先後捐給二千餘金不少吝惜曰聊以資保赤之仁也至若施捨湯藥廣置義塚館生殯死戚

友中待以舉火者數百家鄉里景其懿行往往稱為善人而不名以子官封中書年八十而卒卒之日異香滿室有高僧某能前知以為苦行頭陀再世云

張澹

字素菴十歲即以神童入泮長益力學從學于湖南葛寅亮之門著有四書偶見讀史鈔色養孀母備極孝敬性尤好義值明末歲祲主賑里中全活無筭遇有奇烈苦節者不憚表彰曰吾痛早孤深悉荼苦其他排難解紛每為閭里推服一時有彥方太丘之目年八十有九連舉鄉賓提學劉元琬請于巡撫田逢吉檄知府稽宗孟給扁旌以儒行可風有四子皆游庠世燾尤知名早天其婦周苦節孝舅撫孤瑛亦垂髻入學一堂四世皆以高行著稱

吳維楨

字左廷幼隨父名溢授經名溢名噪復社維楨以卅角從遭歲荒輟業年十六事居積奉養二親垂白同孺慕年六十餘遭母喪哀毀骨立當親在與弟嘉枚同室居女兄貧迎養於家終其身楨性伉

直不屑屑與人寒溫及人有患難緩急輒推解排救不少靳事已無德色尤篤族誼方閩逆煽亂民間被俘子女捐千金倡贖事聞制府李公之芳深獎異焉以子炳官封國子監學正壽終八十有六父母兄弟俱登大耋內外曾元幾及百人卒之年作自述二篇誠子孫畧云心靜神清利欲不沾于中聲色不滑于外便是養生之道又云言為心聲心細則言不妄又云持情必平處物必恕恩欲人知便有假恩德欲人報便是薄德觀斯言也殆亦聞道者歟

錢震彪

字文蔚居近甘泉菴嘗捐資市米令僧為粥以食縲絏冬施薦席夏予巾扇數十年不倦又嘗佐贖難民助建保赤堂一時競有高義之日每念惜字為善最鉅澆燭者多用廢書裹心暴褻殊甚因廣為勸禁次子登峰膺癸卯鄉薦已未復捷南宮孫經紳亦中已卯舉人宰富順多善政人以為惜字之報為人孝義年九十有五子齊章為郡諸生力行善事稍有過必禱神以自改悔早年多病無子

張維仁

至五十餘始舉二子蓋同胞產者因名之曰周達周迺皆有聲膠序齊章年至九十有二父丁皆耄耋無疾而終

周德澍

字應望郡諸生修髯廣頰鄉黨中或以是非告者澍排難解紛無不各當其意而去家貧築室楓林鍵戶讀書四方問字者戶常履滿徵士吳農祥稱其品行醇粹有古長者風壽八十一歲而卒妻奚氏有婦德白首相莊卒年七十九子家桂力學早世婦張氏矢志守貞督學彭始搏旌其門日夜月機聲人咸以為長厚之報云

黃天賜

字沛霖少工舉子業為人恂恂雅飭喜怒不形處兄弟友愛無幾微相失有適楊姊遇隣火時方娠天賜從烈焰中負之至家絕無怨色一破杭城俗忌幼孤遵母命長齋以至壽終閭里推為長者孫正緣登癸巳賢書

王國祥

字熊符生有至性年十五伯兄歿晨夕痛悼又一年遭父喪擗踊哀號毀幾滅性喪葬祭奠必慎必誠奉孀母事寡嫂愛敬備至後皆以壽終姊氏娶處有年布帛菽粟每歲畢給復以女妻孤甥俾無失所厥弟三人豐之以衣食厚之以婚娶誨之以入膠庠伯兄遺一女撫而嫁之奩資踰於已出教育從子多成學業宗族親串凡有緩急罔弗傾橐濟焉家故素封後稍稍中落然處之恬如利濟之心未嘗偶懈也享年七十有六無疾而卒子二人長蔭華邑諸生為兄國禎後餘子若孫皆以儒學世其家

章士旭

字念修為人醇厚人以急難相聞雖在行路必引手救其婦翁張仲嘉立悲智社以濟焚獨士旭益推而廣之又嘗買地以葬無後者建育嬰堂於吳山下倩人抱道路棄兒僱乳媪乳之每月朔望必躬詣其所召媪抱兒以次視之衣服偏給時其寒煖燥濕疾病醫藥之費不少懈及長人頤者具領狀與之行之四十年如一日後布政使馬如龍別建保赤堂於武林驛下有司取育嬰法行之

事士旭辭以老然猶朔望往視佐以私財於是方伯表其堂曰樂善不倦邑令遲題博濟遺風以贈之卒

年七十八

洪超

字玉宋性最孝事繼父與本生父俱能曲承親志內外無間言他如推住宅以與人置祀田以贍後一以敦睦本支為念大學士黃文僖公超舅氏也文僖嘗鬻產超應受居間金三百超不取益之產價中又鄉達某被臺臣糾以金勾超轉白超直辭以文僖力言無罪勾者喜即以金贈超超怒而返之其生平介節類如此性敏給博通經籍注周易通鑑諸書各得領要而獨淡於仕進居鄉雖方正自持仍與物無忤故人咸樂依之年七十餘卒子潢讀書善善政孝友饒有父風煙雲來龍岩縣丞性清介多

張所涵

樂善性成平居好施藥餌濟人疾苦常捐田五十畝給育嬰堂為保赤之需閭里傳頌

金應登

字涵所性孝友喜讀書後廢舉業涉獵世務為人慷慨有豪俠風凡急難告貸傾囊應之無倦

意暮年精神益矍鑠每朔望必策杖至先塋拜掃風雨不辭教子孫以孝行爲先有積負不償者悉焚其券年七十有九卒子三人長元鼎值三藩之變以軍功知建寧府甌寧縣孫六人長科登丁酉順天賢書論曰自唐虞三代有養老之典於是耆老有君子庶人之分君子者以其位庶人者以其齒然非徒尙齒與位也皆以崇德也是故五帝憲三王有乞言皆尊之於辟雍授之以几杖羞之以珍饌謹之以祝嘏祝噎禮樂備矣然後記之以惇史其巡守則問百年者而就見之蓋如是其敬以重也秦漢而下其事盡廢然猶令有司歲時存問月賜羊酒之制豈非天壽平

格自非吉人莫享上壽歟雖然山臞野史不識不知之人而或至期頤壺內賢媛以無聞無見而或臻耄耄皆以無累爲心而適全其天以爲人瑞則可矣不必其厚德也若夫仁心爲質而醇謹自持義施獨急而樂善不倦如保育嬰孩回贖難婦皆行之數十年以終其身者視宋之蔣崇仁兄弟何如也蔣氏皆布衣賜爵列侯廟祀至今况如前所云者實有其人可不亟稱之以勸夫後之爲善者乎

金塘縣志

卷之三十三

六

紅印

